

**Акафист
преподобней Елисавете Константинопольской,
чудотворице**

Кондак 1, глас 8, подобен: Взранной Воеводе:

Избранней от превечнаго Бога чудотворице предивней
тебе, преподобная мати Елисавето,
похвальное приносим пение.

Ты же, яко имущая велие дерзновение ко Господу,
от всяких нас бед и болезней свободи
и к добродетели настави, да зовем ти:

Радуйся, преподобная мати Елисавето,
чудотворице, Богом избранная.

Икос 1

Ангелов Творец и всея твари Содетель избра тя, всечестная, прежде
рождества (от чрева материяго) послужити Ему в преподобии и правде, темже и
многими дары небесными украси тя. Сего ради и мы, славяще равноангельное
житие твоое, со благоговением воспеваем ти сицевая:

Радуйся, пречестное селение Святыя Троицы;
радуйся, ангелом благоговейная собеседнице.

Радуйся, сокровищнице даров Духа Святаго;
радуйся, благоуханная ветве райская.

Радуйся, всем сердцем Христа возлюбившая;
радуйся, сораспятившися Спасителю возжелавшая.

Радуйся, многими чудесы Творца прославившая;
радуйся, надеждо и помоще всем с верою тя призывающим.

Радуйся, преподобная мати Елисавето,
чудотворице, Богом избранная.

Кондак 2

Видя многомилостивый Господь богоугодное житие родителей твоих,
Елисавето всечестная, по мнозех летех безчадия послала святую мученицу Свою
Гликерию благовестити им радость велию о грядущем рождении твоем. Мы же,
дивящеся преславному видению сему, Творца и Промыслителя всяческих
славословим, вопиюще Ему: Аллилуйя.

Икос 2

Разумом божественным и благодатию еще во чреве матере твоей
просвещенная, всеславная Елисавето, издетска явила еси образ жития
добродетельного, чтению же Писания Священного и жития святых угодников
Божиих, паче же к молитве усердно прилежала еси. Мы же, сему подражати
ревнующе, со умилением воспеваем ти таковая:

Радуйся, рода честнаго отрасле доброплодная;

радуйся, от неплодныя старицы, яко и Предтеча, прозябшая.
Радуйся, именем матере величайшаго пророка нареченная;
радуйся, уподобитися праведной Елисавете во святости предызбранная.
Радуйся, от младенства сердце твое Господеви предавшая;
радуйся, измлада водительству Духа Святаго прилежавшая.
Радуйся, яко от юности разум твой просветися высшею премудростию;
радуйся, чистотою душевною, яко богосветлая свеща, возсиявшая.
Радуйся, преподобная мати Елисавето,
чудотворице, Богом избранная.

Кондак 3

Сила Христова осени тя, богомудрая Елисавето, и дарова ти крепость претерпети искушения врага невидимаго, егоже стрелы разжженныя слезными к Богу молитвами угасила еси и ко иноческому подвигу мужественно устремилася еси, жестокое житие имущи: болезньми постническими плоть укрощающи, духом же укрепляема, Богови присно поющи: Аллилуия.

Икос 3

Имущи в сердце твоем единаго Бога, всечестная Елисавето, по кончине родителей твоих все имение нищим раздала еси, и град твой Ираклию оставивши, в цареградскую обитель пришла еси, идже, красоты мира сего отвергши, во образ ангельский облеклася еси. Мы же, любовь твою ко Господу воспевающе, величаем тя сице:

Радуйся, паче земных небесная возлюбившая;
радуйся, на Господа все упование возложившая.
Радуйся, богатство и славу мира сего ни во что же вменившая;
радуйся, сокровищу нетленному всем серцем прилежавшая.
Радуйся, цвете девства и чистоты;
радуйся, плоть духови покорившая.
Радуйся, яко радость послушания прежде соблазнов мира сего познала еси;
радуйся, яко, иноческим путем шествующи, небесных обителей достигла еси.
Радуйся, преподобная мати Елисавето,
чудотворице, Богом избранная.

Кондак 4

Бурю враждебных помыслов и мирских пристрастий постнически усмирила еси, мати Елисавето преславная, в зимнюю стужу горением божественныя любве согревающися, тело слезами псаломски омывающи, душу богоподобну соделала еси, непрестанно Христа славящи: Аллилуия.

Икос 4

Слышавши глаголы евангельския о мытари, не дерзвшем взирати на небо, ты, о блаженная мати, сему в покаянии подражающи, три лета очи к высоте не

возводила еси, долу главу приклонши, сердечными же очима небесною лепотою умно наслаждающися. Темже многотрудное твое славяще житие, воспеваем ти тако:

Радуйся, во едином хитоне стужу и зной терпевшая;
радуйся, безстрастием в ризу нетленну, свыше истканную, облекшаяся.
Радуйся, совершенную четыредесятницу постившаяся;
радуйся, не брашны, но хлебом небесным насыщавшаяся.
Радуйся, в воздержании величайшему из рожденных женами подражавшая;
радуйся, горлице пустыннолюбная, в Цареграде яко в пустыни обитавшая.
Радуйся, семя проповеди великаго Предтечи в сердце твоем насадившая;
радуйся, в покаянии три лета очи долу низводящи, плоды сторичныя принесшая.
Радуйся, преподобная мати Елисавето,
чудотворице, Богом избранная.

Кондак 5

Всесветлая звезда Царскому граду явилася еси, Елисавето всехвальная, на высоту совершенства смирением вознесенная и терпением к новым подвигом приуготованная: дары божественными паче обогатилася еси, славословиящи непрестанно Вседержителя Бога: Аллилуия.

Икос 5

Видев тя святитель Геннадий добродетелей исполненну и даром разсуждения духовнаго благоукрашенну, по кончине игумении постави тя, преподобная Елисавето, преемницу ея. Ты же, трудолюбно подвзывающися, богомудрая наставница явилася еси не токмо сестрам обители твоей, но и женам мирским, научающи от лжи, лукавства и злословия удалятися, слабость ума молчанием восполняти, в любви христианстей и подвизех молитвы возрастати. Темже молим тя, мати преблагая, буди и нам во брани со страстьми помощница, да зовем ти:

Радуйся, в Цареграде наставницею монашествующих утвержденная;
радуйся, служения сего во всем мире даже до днесь не оставляющая.
Радуйся, чистотою нрава образ воздержания показующая;
радуйся, укрепление всех в терпении подвзывающихя.
Радуйся, яко сетей злозычия и лукавства избегати научаеши;
радуйся, яко неразумных жен нелицеприятно обличаеши.
Радуйся, яко празднословия и лжи бегати повелеваеши;
радуйся, чистый сосуде безмолвия, трезвения и кротости.
Радуйся, преподобная мати Елисавето,
чудотворице, Богом избранная.

Кондак 6

Проповедница немолчна судеб Божиих явилася еси, Елисавето блаженная, возвестила бо еси грядущее на град Константина запаление огненное.

Состраданием же движима, вкупе с преподобным Даниилом Столпником человеколюбца Бога дерзновенно молила еси о людех, пострадати имущих. Егда же молитвами вашими угасе огнь, благодарственно вси возопиша Творцу: **Аллилуия.**

Икос 6

Возсия спасительная луча граду твоему, всехвальная, егда велением свыше грядущее бедствие благоверному царю Льву прорекла еси. Темже молим тя, о мати милосердная, не остави и нас, грешных и немощных, во дни испытаний наших, отведи всякий гнев от надеющихся на тя и вопиющих ти таковая:

Радуйся, избраннице Божия, тайны грядущаго ведавшая;
радуйся, гнев на милость пременити Господа Бога умолившая.

Радуйся, едина от праведник, ихже ради отврати Господь от града сожжение;

радуйся, от огня геенского верных спасение.

Радуйся, заступление твое и во стране Русстей являющая;
радуйся, раны и ожоги елеем от иконы твоей исцеляющая.

Радуйся, к покаянию и пременению злых обычаев нас призывающая;
радуйся, от пагубы и обнищания многих спасающая.

Радуйся, преподобная мати Елизавето,
чудотворице, Богом избранная.

Кондак 7

Хотя явити силу Свою, дарова тебе Вседержитель Господь Креста оружие непобедимое, имже змия древняго, во образе зримом явльшагося, победила еси. К твоему предстательству прибегающе, мати досточудная, молим тя, помози и нам тою же силою побеждати невидимыя враги, песнь победную воспевающе: **Аллилуия.**

Икос 7

Новую обретше тя избранницу Божию, людие Евдомонский веси со слезами и упованием к тебе притекоша, моляще избавити их от драконта лютаго, пожирающаго всякаго мимоходящаго. Ты же, о преславная воительнице Христова, честным крестом вооружившия и к логову зверя пришедши, знамением крестным того умертвила еси, пятою поправши главу его. Людие же, чудо сие видевше, в радости воспеша ти сице:

Радуйся, во священней обители великомуученика Георгия подвизавшаяся;
радуйся, силу его победоносную духовно восприимшая.

Радуйся, знамением Креста силу вражию победившая;
радуйся, победу на невидимаго врага сим оружием получившая.

Радуйся, главу змия пятою поправшая;
радуйся, решимости во брани духовней нас научивающая.

Радуйся, одержимых страхом защитнице;
радуйся, от напастей и нашествия врагов избавительнице.

Радуйся, преподобная мати Елисавето,
чудотворице, Богом избранная.

Кондак 8

Странная и преславная совершающи чудеса, о всеблаженная мати, телесныя исцеляши недуги, паче же научаши прежде о души пещися, яко душа больши есть тела: тако и недузи плоти уклонением от греховных навыков во здравие претворяются. Сего ради, богоудрая, родителю кровоточивыя отроковицы, ценою всего имения жаждущему здравие дщери своей купити, заповедала еси прежде смиренномудрие и нищелюбие стяжати, сими бо добродетельми благоугождается Бог, даруяй здравие и велию милость труждающимся и с верою вопиющим Ему: Аллилухия.

Икос 8

Вся чудеса твоя зряще, преподобная, жены неплодныя и кровоточивыя начаша притекати во обитель твою, и яко евангельская жена, краю ризы Господни коснувшаяся, исцелися, тако и сия, помазанныя тобою святым елеом, аbie исцеляхуся, велиим гласом воспевающе ти таковая:

Радуйся, рождеством своим неплодство родителей разрешившая;
радуйся, неплодным прежде женам веселье о чадех дарующая.

Радуйся, любве ради ко Христу девство избравшая;
радуйся, жен недужных силою молитв твоих исцеляющая.

Радуйся, заповеди евангельский исполняти повелевающая;
радуйся, стяжанием добродетелей, яко водою живою, болезни врачующая.

Радуйся, мольбы родителей, здравия чадом просящих, не отрывающая;
радуйся, всем притекающим к тебе с верою милость от Бога испрашивающая.

Радуйся, преподобная мати Елисавето,
чудотворице, Богом избранная.

Кондак 9

Все естество ангельское удивися силе Божией, в немощнем сосуде женского естества действующей. Егда очи слепорожденному отверзла еси, преславная мати Елисавето, тогда прослави Творца исцеленный тобою слепец, гласом Вартимеовым вопия: Аллилухия.

Икос 9

Витийствовать не может язык наш высоту чудотворений твоих, богоухновенная мати! Кто повесть, како возсия свет во очию слепорожденного, припадшаго к тебе с верою и возопившаго: «Помилуй мя, верная ученице Божия!» Ты же, состраданием преисполнена, воздевши руце в молитве, елеом помазала еси зеницы незрячия, и паки во всю седмицу не престала еси умоляющи Источника всякаго света, Господа нашего Иисуса Христа, даровати прозрение слепцу убогому, ведущи, яко близ есть Господь. Сама же ты, о мати

святая, видение светозарное и божественное удостоилася еси лицезрети. Тако и мы, слепи суще душею, прозрети же твоими молитвами желающе, взваем ти:

Радуйся, цельбоносная купеле, очи незрячия отверзающая;

радуйся, свет Христов святостию жития являющая.

Радуйся, прекрасный цвете, чудесы исцелений благоухающий;

радуйся, светлая звездо, путь ко спасению освещивающая.

Радуйся, тайны Божия очима сердца познавшая;

радуйся, существо Духа Святаго на Святыя Дары созерцавшая.

Радуйся, в чертозех небесных трисолнечным светом ныне наслаждающаяся;

радуйся, врачевство очес от иконы твоей нам щедро посылающая.

Радуйся, преподобная мати Елисавето,

чудотворице, Богом избранная.

Кондак 10

О спасении души ревнующи, мати честная, пред исходом от временного жития сего, места близкая сердцу твоему, посетила еси: Ираклии же достигши, в Халкопратийстей церкви Богородицы чудесного явления мученицы Гликерии сподобилась еси, яже возвести ти скорое преселение во Отечество Небесное, идеже херувими воспевают непрестанно: Аллилуия.

Икос 10

Стена твердая и заступление необоримое явилася еси всем с верою к тебе прибегающим: ибо и по отшествии твоем во обители вечныя не пристаеш чудотворити и являти помощь твою. Достойно и славно бысть сие представление твое, преподобная мати, егда ты, праздник во обители великомуученика Георгия светло совершивши, с молитвою предала еси душу твою в руце Господни, глаголющи: ныне отпущаеши рабу Твою, Владыко, с миром: и небесною лепотою просия пресветлое лице твое. Мы же, блаженную кончину твою воспевающе, восписуем ти сицевая:

Радуйся, весть о исходе твоем с радостию восприимшая;

радуйся, дево благоразумная, Жениха твоего бодрственно ожидавшая.

Радуйся, доброплодная смоковница, в вертограды райских пресажденная;

радуйся, со ангелы ныне трисвятую песнь воспевающая.

Радуйся, состраданием к недужным преисполненная;

радуйся, ходатаице пред Владыкою о всех просящих тя.

Радуйся, яко о спасении нашем Господа умоляющи;

радуйся, яко в час исхода нашего место покойно душам уготовляющи.

Радуйся, преподобная мати Елисавето,

чудотворице, Богом избранная.

Кондак 11

Пение хвалебное приносим ти, пречудная мати Елисавето, яко и ныне во граде Москве являющи чудодейственную силу твою неисцельно недугующим,

от бесов мучимым и во отчаянии сущим, да вси прославят Творца и Зиждителя, воспевающе: Аллилуйя.

Икос 11

Светоносную свещу зrim тя, святая Елисавето, с высоты светящую, и светом чудотворений просвещающую души воспевающих ти похвальная сицевая:

Радуйся, звездо, в созвездии святых ясно сияющая;
радуйся, лучами благодати мир согревающая.

Радуйся, многосветлая лампадо Божественного Света;
радуйся, божественный огнь любве в душах наших возжигающая.

Радуйся, многоплодная розго, грозды приносящая исцелений;
радуйся, во служении страждущим волю человеколюбца Бога исполняющая.

Радуйся, надеждо наша, горькая рыдания на слезы умиления претворяющая;

радуйся, радосте наша, от иконы твоей целебную силу являющая.

Радуйся, преподобная мати Елисавето,
чудотворице, Богом избранная.

Кондак 12

Благодать чудотворений от всещедраго Бога прияла еси, преблагая мати Елисавето, по достоинству бо чудотворица наречена бысть, и не токмо в земном житии, но и по кончине величием чудес нас удивляши и славити Господа призываши: Аллилуйя.

Икос 12

Поюще Бога, дивнаго во святых Своих, славим тя, мати всехвальная, предстояще пред образом твоим честным со упованием, да не отвратиши лица твоего от нас, но яко в земном житии твоем ни единаго просящаго отринула еси, тако и ныне приими глас моления нашего, с любовию вопиющих ти таковая:

Радуйся, Церкве Христовы славо;
радуйся, законы естества превозшедшая.

Радуйся, девства предивное совершение;
радуйся, преподобных преславное украшение.

Радуйся, инокинъ во граде Москве, яко и в Царьграде прежде, наставнице;
радуйся, обители, под покровом твоим сущей, похвало и радование,

Радуйся, неисчерпаемый источниче исцелений;
радуйся, пороков и страстей искоренительнице.

Радуйся, преподобная мати Елисавето,
чудотворице, Богом избранная.

Кондак 13

О прехвальнаѧ угоднице Божия, преподобная мати Елисавето, чудотворице цареградская и верная заступнице наша! Приими малое моление сие, с любовию тебе приносимое, и всесильным твоим ходатайством всякое зло от нас отжени и к свету заповедей спасительных возведи, да в страшный день Суда одесную праведнаго Судии ставше, сподобимся купно с тобою воспети радостно: Аллилуйя.

Сей кондак глаголи трижды, посем 1-й икос и 1-й кондак.

Молитва

О пречудная мати наша, великая угоднице Божия Елисавето! Леностию и иными страстью побеждаеми, недостойны есмы возносити молитвы тебе, вся тяготы монашескаго подвига понесшей и души своея ради возлюбленнаго тобою Христа не пощадевшай. Но како востанем со одра болезни без врача, или уразумеем премудрость без учителя? Сего ради припадаем к тебе, наставнице нашей и чудотворице, и молим: исцели нас от страстей, отверзи очи наша сердечныя, да возненавидим грех, живущий в нас, и омывше душу слезами покаяния, всем сердцем Спасителя нашего Господа Иисуса Христа возлюбим и Ему, отвергшеся себе, поработаем. Молим тя и о ближних наших: болящих исцели, в бедах и обстоянни сущих защити, неплодным женам радость о чадех даруй, юных от прельщений мира сего покрый, и вся ны на спасительныя стези направи, да сподобимся в небесных обителех непрестанно славити Всесвятую Троицу во веки веков. Аминь.